



**2DA SESSIONE URDINARIA DI U 2025
RIUNIONE DI I 30 È 31 D'OTTOBRE DI U 2025**

2^{ÈME} SESSION ORDINAIRE DE 2025
RÉUNION DES 30 ET 31 OCTOBRE 2025

N° 2025/O2/068

**Question orale déposée par Mme Marie-Claude BRANCA
au nom du groupe « Core in Fronte »**

OBJET : SPUSTÀ SI IN CORSICA : UN DRITTU PAR TUTTI ?

Sgiò cunsiglieri in carica di i trasporti,

Avemmu tutti intesu parlà di ghjovani di u rughjonu di Portivechju scularizzati in Bastia chì, à u principiu di sittembri, ùn sò stati presi in carica da u trasportadori è si so ritrovi soli annant'à sti stradi. Eppuri si sa chì, in u rispettu di l'accordi incù a noscia cullittività, sò priuritari annant'à l'altri passaghjeri. Qualchi settimane dopu, in Aiacciu, in cunfurmità incù st'accordu sò una dicina di parsoni – pà a part'è più parsoni anziani- chì ùn hani pussutu andà à ritruvà i so famiddi in u rughjonu di Portivechju.

Allora, sapemu chi sò prublemi chi accadini raramente, sapemu chi l'errori asistini, sapemu dinò chi monda sforza sò fatti pà parmetta à ogni ghjovanu di pudé suvità a furnazioni chi l'intaressa è chì ùn asisti micca in u so rughjonu. Ma ci pari chì à u vintunesimu seculu ugnunu, ghjovanu o anzianu, duvaria avé a pussibilità di sputà si facilmenti da un cantu da a Corsica à l'altru incù i trasporti pubblici.

Di fatti tutti ùn hani a pussibilità finanziaria o fisica d'avé una vittura. Di più vi ramintemu chì in monda loca di Corsica u trenu ùn ci hè. S'hè parlatu, è si ni parla sempri monda di u trenu fin'à I Fulelli parchì ùn si pudaria rimettalu fin'à Bonifaziu ?

Par quiddi chì ùn campani in sti rughjona hè difficiuli d'imaginà i prublemi pà andà da un locu à l'altru. Par quiddi chì ci stani hè un sciappacapu chì pò caccia a vulintà di studià, di circa un travaddu o di curà si. Si sà par esempiu chì a difficoltà di spustà si hè un fattori di precarità pà i studenti di l'Università.

In sti rughjona monda hani l'imprissioni d'essa sminticati da Diu ... o almenu da a Culletività.

Sò stati fatti l'inchiesti annant'à i prublemi di mubilità, in u quadru di a riflissioni annant'à u PADDUC sarà fattu un travaddu annant'à una mubilità durevuli è facilitata in tutti i rughjoni di Corsica ma pà avali ùn avemu vistu nudda di cuncretu.

Allora sgiò cunsiglieri vi dumandemu :

A curt'andà si tuttu hè statu fattu pà regulà i prublemi incù l'autobus

À long'andà si vo aveti riflituttu à una manera di facilità i trasporti pubblici in tutti i rughjona di Corsica pà parmetta à tutti i cittadini d'avé i stessi dritti à l'educazioni, à u travaddu è à a saluta ?

Vi ringraziemu.